

## — 312 —

darzuo heißen tun, das der schade vf gerichtet werde vnd widertan. Vnd sol man och denen folgen, als da vor geschriben stat, vnd bescheiden ist. Doch setzen wir vnd gebieten, das kein herre noch kein stat, die zu disem lantfriden hören, nit gebunden noch schuldig sint, zuo helfende, noch zuo dienende, iemanne, der zu disem friden nit enhöret, ez sin herren oder stette, si entuon es denne gerne, dienet aber ieman dar über, keine herren oder stette, die zuo dem lantfriden nit enhörent, was der schaden lidet, da er ist man im nit schuldig zuo zehelfende, von des lantfriden wegen, man tuge es denne gerne. Wer es aber, daz ieman, es sin herren oder stette, die zuo disem lantfriden hören, in des lantfriden ziln, oder von des lantfriden wegen geschadiget wurden, nu oder hienach, oder in dem ersten lantfriden, der nu ze nehest vs gegangen ist, geschadiget were, denne, oder den, sol man beholfen sin, vf den eit als lange, bis im widertan werde, vnd sin schade vferichtet ane alle geuerde. Hette och ieman vor disen selben zwen lantfriden iemanne, der zuo dem lantfriden gehöret schaden getan, das mag dirre lantfride och wol rechtvertigen, ob es die herren vnde die stette die zu dem lantfriden hören gemeinlich zuo rat werdent. Doch ist es vnser guot wille, daz es ein ieglich herre, oder ein stat, die zuo disem lantfriden gehören einen ieglichen guoten man, er si herre, ritter oder knecht, pfaffe oder orden, die in des vorgeannten friden zil gesezet sint, vnd den friden zuo beschirmende beholfen wellent sin, zwischent hie vnd deme vorgeannten sunntage, der zuo nehest komet, empfahen mügent zuo disem friden, si vnd ir gewaltigen amptlute, mit allen den gebingen vnd fürworten, als dirre lantfride geschriben siet, vnd als si truwent uf iren eit, daz es dem friden vnd dem lande nug vnde gut si ane alle geuerde. Aber nach dem vorgeannten sunntag, so sol weder herre noch stat, die zuo dem lantfriden hören, iemanne zuo disem lantfriden empfahen, si entuon es denne alle gemeinlichen miteinander, ane die von Straßburg, die mügent vor dem vorgeschriben zile vnd darnach in disem lantfriden empfahen, wen si wellent, den si truwen